



Saunia e Elder Russell M. Nelson

○ Le Korama a Aposetolo e Toasefululua

Faasaga Atu ma le Faatuatua i le Lumanai

O upumoni, feagaiga, ma sauniga e mafai ai ona tatou faatoilalo le fefe ae faasaga atu ma le faatuatua i le lumanai!

O'uso e ma tuafafine pele, faafetai atu mo la outou uuna-iga lagolago, e le gata i le sii o outou aao, ae faapea foi i la outou auaunaga siitia i aiga, i le Ekalesia, ma o outou nuu. Matou te fia vaai atu lava ia te outou ma o outou aiga ma uo. Po o fea lava o outou nonofo ai matou te iloa a outou taumafaiga ia avea lenei lalolagi ma nofoaga e sili atu. Matou te lagolagoina outou! Matou te alolofa ia te outou. E pei ona outou tatalo mo i matou, o loo matou tatalo foi mo outou!

Ua matou vaaia faalemafaufau o outou aiga o loo faapotopoto i le televise po o le initoneti e matamata i le fale ia taualumaga o le konafesi aoao. Sa auina mai e se tina ma se tamā mataala se kopi o se ata na pueina i le taimi o le konafesi. Sa la matauina aga a le la atalii e 18-masina le matua, sa na iloa ina foliga ma le leo o le faila-uga. Sa amata e le tamaitiiti ona feula atu kisi i le TV. Sa manao o ia e soso latalata mai. O lea na vave si'i ai e lona tuafafine matua magafagafa le tuagane laititi i ona tauau ma faalatalata mai ai o ia. O le ata lea.

Ioe, o le ata i le TV o a'u, ma o fanau na a le ma fanau. I ni nai tau-saga, o le a avea lenei alii o se toeaina,

ua faaeeina i le malumalu, ma saunia ai mo lana misiona. Mulimuli ane o le a faamauiina ai o ia i se soa e faavavau na te filifilia. Pe ua mafai ea ona outou vaai atu ia te ia i se aso, o se tane ma se tamā, ma ana lava fanau? O le a i ai se aso, o le a faatofa ai i ona tamama-tutua, ma se iloa mautinoa o le oti o se vaega o le olaga.

E moni lava. Tatou te ola ina ia oti, ma e tatou te oti foi ina ia toe ola ai. Mai se vaaiga e faavavau, na pau lava le oti e le atoatoa moni o le oti lea o se tasi e le'i saunia e fetaia'i ma le Atua.

I le avea ai o ni aposetolo ma ni perofeta ua matou popole ai e le gata i a matou fanau ma fanau a fanau, ae faapena foi—ia outou fanau, ma fanau taitoatasi a le Atua. O mea uma o loo faapolopoloina i le lumanai mo fanau paia taitoatasi a le Atua, o le a mamanuina e ona matua, aiga, uo, ma faiaoga. O lea la, o o tatou faatuatua i le *taimi nei* e avea ma se vaega o faa-tuatua o a tatou fanau *mulimuli ane*.

O le a uia e tagata taitoatasi lona lava ala i se lalolagi e fesuisuia'i pea—o se lalolagi o manatu faatautavā. O le a tumau pea ona tetee mai au a le tiapolo i au o le lelei. O loo taumafai pea Satani e faatosina i tatou

ia mulimuli atu i ona ala ma ia tatou malaia ai, e pei lava o ia.¹ Ma o tulaga masani o le olaga e lamatia ai e pei o gasegase, manuaga, ma faalavelave faafuasei o le a tumau pea ona i ai.

Ua tatou ola i se vaitaimi faigata. O mafuie ma galulolo ua afua ai faatafunaga, ua faaletonu faigamalo, ua ogaoga tele le atuatuvaale ona o le tamaoaga, ua osofaia aiga, ma ua tele faaipoipoga e tatalaina. Ua i ai se pogai tele tatou te popole ai. Ae e le tatau ona tatou faatagaina o tatou popolega e suitulaga i lo tatou faatuatua. E mafai ona tatou faafetoaia na popolega e ala i le faamalosia o lo tatou faatuatua.

Amata i lau fanau. Ua ia te outou matua le tiutetauave autu o le faama-lolosia o o latou faatuatua. Ia latou lagonaina o outou faatuatua, e tusa lava pe oo atu ai i o outou luga ni tofotofoga faigata. Ia taulai atu o outou faatuatua i lo tatou Tama Faalelagi agalelei ma Lona Alo Pele, o le Alii o Iesu Keriso. Ia aoao atu e uiga i lena faatuatua ma le talitonuga maumau-tutu. Aoao ia alii po o tamaitai faapele-pele taitoatasi, o ia o se atalii/afafine o le Atua, na foafoaina i Lona faatusa, ua i ai se faamoemoega paia ma gafatia. Ua fananau mai i latou taitoatasi ma ni luitau e faatoilalo ma atiina ae le faatuatua.²

Aoao atu e uiga i le faatuatua i le ata o le faaolataga a le Atua. Ia aoao atu o la tatou malaga i le olaga nei o se taimi faataitai, o se taimi e su'e ma tofotofa i pe o le a tatou faia soo se mea e poloai mai ai le Alii tatou te faia.³

Aoao atu e uiga i le faatuatua e tausi ai poloaiga *uma* a le Atua, ma ia iloa ua tuuina mai e faamanuia ai Lana fanau ma aumai ai ia i latou le olioli.⁴ Lapatai atu ia i latou o le a latou fetau i ni tagata o le a latou filifili po o le fea poloaiga latou te tausia ae le ano i isi poloaiga latou te filifili e soli. Ou te

ta'ua lenei mea o le 'ai filifili i poloaiga e usitai i ai. O lenei faiga o le ilo ma filifili o le a le manuia. O le a oo atu ai i le faanoanoa. Ina ia saunia e fetaia'i ma le Atua, o lea e tausai ai e se tagata ia Ana poloaiga *uma* E manaomia ai le faatuatua e usitaia ai, ma o le tausia o Ana poloaiga o le a faamalosia ai lena faatuatua.

O le usiusitai e mafai ai ona tafe mai faamanuiaga a le Atua e aunoa ma le tau taofiofia. O le a Ia faamanuiaina Ana fanau usiusitai i le saoloto mai le saisaitia ma le faanoanoa. Ma o le a Ia faamanuiaina i latou i le malamalama e sili atu. Mo se faaitaiga, e tausia e se tagata le Upu o le Poto ma le iloa o le usiusitai o le a le gata ina saoloto ai mai mea e fai ma vaisu, ae o le a faapea foi ona faaopoopo ai faamanuiaga o le atamai ma oa sili o le malamalama.⁵

Aoao atu e uiga i le faatuatua e iloa ai o le usiusitai i poloaiga a le Atua o le a aumaia ai le puipuiga faaletino ma le faaleagaga. Ma ia manatua, e avanoa pea agelu paia a le Atua e fesoasoani mai ia i tatou. Ua tautino mai e le Alii: "Ou te muamua atu i o outou luma. Ou te i ai foi i lo outou itu taumatau ma lo outou itu tauagavale, a o lo'u Agaga o le a i o outou loto, e siomia foi outou e a'u agelu, e lagolagoina outou."⁶ Se folafolaga ina a matagofie! A tatou faatuatua, o le a fesoasoani mai o Ia ma Ana agelu ia i tatou.

O le faatuatua e le vaivai e faamalosia e ala i le tatalo. E taua ia te Ia a outou aioiga faatauana. Mafaufau i tatalo faatauana ma le faamaoni a le Perofeta o Iosefa Samita i aso matautia o le faafalepuipuiina i le Falepuipui o Liperate. Sa tali mai le Alii i le suia o le vaaiga a le Perofeta. Na Ia fetalai, "Ia e iloa ai, lo'u atalii e, e tuuina atu ia te oe le poto masani ona o ia mea uma, ma avea mou lelei."⁷

Afai tatou te tatalo ma se vaaiga e



faavavau, tatou te le tau mafaufau pe o faafogaina mai a tatou aioiga aupito sili ona faanoanoa ma loloto. O loo faamaumauina lenei folafolaga mai le Alii i le vaega e 98 o le Mataupu Faavae ma Feagaiga:

"O a outou tatalo ua oo mai i taliga o le Alii . . . ma ua tusia faatasi ma lenei faamaufaailoga ma moli-mau—ua tauto le Alii ma poloaiina o le a talia lava.

"O lea, ua ia tuuina atu ai lenei folafolaga ia te outou, ma se feagaiga le maliliuina o le a faataunuuna; o mea uma foi na puapugatia ai outou o le a galulue faatasi mo lo outou lelei, atoa ma le mamalu o lo'u igoa ua faapea mai ai le Alii."⁸

Na filifilia e le Alii Ana fetalai ai aupito malolosi e faatoafilemu ai i tatou! *Faamaufaailoga! Moli-mau! Tauto! Poloaiina! Feagaiga le maliliuina!* Uso e ma tuafafine, talitonu ia te Ia! O le a faafogaina e le Atua au tatalo faamaoni ma faatauana, ma o le a faamalosia ai lou faatuatua.

Ina ia atiina ae le faatuatua tumau, e taua ai se tautinoga tumau ia avea

ma se tagata e totogi atoa le sefuluai. O le mea muamua lava, e manaomia le faatuatua i le totogiina o le sefuluai. Ona atiina ae ai lea e le tagata totogi sefuluai le faatuatua sili atu e oo lava ina avea le totogiina o le sefuluai o se faamanuiaga faapelepele. O le sefuluai o se tulafono anamua mai le Atua.⁹ Sa Ia faia se folafolaga i Lana fanau o le a Ia toina "pupuni o le lagi, ma sasaa atu . . . le manuia mo outou, ina seia silisili ona tele."¹⁰ E le gata i lena, o le totogiina o le sefuluai o le a tumau ai ona tusia lou igoa i le nuu o le Atua ma puipua oe i le "aso o le tau ma sui ma le faamuina."¹¹

Aisea tatou te manaomia ai se faatuatua le maluelue faapena? Aua foi o loo i luma atu aso faigata. I le lumanai, o le a seisei lava faigofie pe lauiloa le avea ma se tagata faatuatua o le Au Paia o Aso e Gata Ai. O le a tofotofoina i tatou uma taitoatasi. Na lapatai mai le Aposetolo o Paulo e faapea, o aso e gata ai, o i latou o e mulimuli ma le filiga i le Alii "e sauaina i latou."¹² O lena lava sauaga e mafai ona olopala ai oe seia e matua vaivai



ai lava, pe faaosofia ai foi oe ia e avea ma faataitaiga lelei ma lototele atili i lou olaga i aso uma.

O le auala e te taulimaina ai tofotofoga o le olaga, o se vaega o le atinaega o lou faatuatua. E oo mai le malosi pe a e manatua o loo i ai sou natura paia, o se tofi e le uma lona taua. Ua faamanatu mai e le Alii ia te oe, lau fanau, ma fanau a lau fanau, o oe o se suli moni, ma sa faapolopoloina oe i le lagi mo lou taimi ma le nofoaga faapitoe e te fanau mai ai, e te ola ae ai ma avea ma Ana ave fu'a ma tagata o le feagaiga. A o outou savavali i le ala o le amiotonu a le Alii, o le a faamanuiaina outou e faaauau pea i Lona agalelei ma avea ma se malamalama ma se faoala i Lona nuu.¹³

E mafai ona maua e outou taitoatasi o uso ma tuafafine ia faamanuiaga e maua mai e ala i le mana o le Perisitua paia Mekisateko. O nei faamanuiaga e mafai ona suia ai tulaga o lou olaga, i tulaga e pei o le soifua maloloina, mafutaga a le Agaga Paia, fegalegaleaiga patino, ma avanoa mo le lumanai. O le pule ma le mana o lenei perisitua ua i ai ki i faamanuiaga faaleagaga uma o le Ekalesia.¹⁴ Ae o le mea e sili ai ona matagofie, ua tautino mai e le Alii o le a Ia lagolagoina na faamanuiaga, e tusa ai ma Lona finagalo.¹⁵

O le faamanuiaga silisili o faamanuiaga uma o le perisitua, e tuuina mai i totonu o malumalu paia o le Atua. O le faamaoni a'ia'i i feagaiga e osia iina o le a e agavaa ai ma lou aiga mo faamanuiaga o le ola faavavau.¹⁶

O lou tau i le a lē na o le olaga a sau e maua ai. E tele faamanuiaga o le a fai mo oe i le olaga lenei, faatasi ai ma lau fanau ma fanau a lau fanau. O outou le Au Paia faatuatua, tou te le tauivi na o outou i o outou luitau. Mafaufau i lena mea! Na folafola mai e le Alii, "Ou te finau atu foi a'u i e ua finau atu ia te oe, ou te faoalaina foi au fanau."¹⁷ Mulimuli ane, na oo mai ai le folafolaga lenei i Lona nuu faatuatua: "O a'u foi, le Alii, ou te tau mo i latou, ma a latou fanau, ma fanau a a latou fanau, . . . e oo i le tupulaga e tolu ma le fa."¹⁸

Ua tuuina mai e lo tatou peresitene pele o Peresitene Thomas S. Monson lana molimau faaperofeta. Na saunoa o ia, "Ou te molimau atu ia te outou, e le mafuatiaina o tatou faamanuiaga folafolaina. E ui ina fofou mai afa, e ui ina to mai uaga i o tatou luga ae o lo tatou malamalama o le talalelei ma lo tatou alolofa i lo tatou Tama Faalelagi ma lo tatou Faaola o le a faamafanafanaina ma lagolagoina i tatou ma aumaia le olioli i o tatou loto a o

tatou savavali ma le amiosao ma tausii poloaiga."

Na faaauau le saunoaga a Peresitene, "Ou uso e ma tuafafine pele, aua tou te fefefe. Ia outou lototetele. E i ai le faamoemoe i le lumanai, pei foi o o outou faatuatua."¹⁹

E faaopoopo atu la'u lava tautinoga i le tautinoga mamana a Peresitene Monson. Ou te molimau atu o le Atua o lo tatou Tama. O Iesu o le Keriso. Ua toefuatai mai Lana Ekalesia i le lalolagi. O Ana upumoni, feagaiga, ma sauniga e mafai ai ona tatou faatoilalo le fefe ae faasaga atu ma le faatuatua i le lumanai! Ou te molimau atu ai i le suafa paia o Iesu Keriso, amene. ■

FAAMATALAGA

1. Tagai 2 Nifae 2:27.
2. Sa aoao mai e Peteru lena aoaoga ina ua ia faailoa mai le faamoemoe "ina ia tofusua faatasi ai outou i le amio atua, ina ua sosola ese outou i le amio leaga o i le lalolagi" (2 Peteru 1:4).
3. Tagai i le Aperaamo 3:25.
4. Tagai 2 Nifae 2:25.
5. Tagai Mataupu Faavae ma Feagaiga 89:19; tagai foi Isaia 45:3.
6. Mataupu Faavae ma Feagaiga 84:88.
7. Mataupu Faavae ma Feagaiga 122:7. O le isi faataitaiga o le suia o le vaaiga o loo tusia i le Salamo: "Ia e leoleoina lo'u agaga; . . . lo'u Atua e, ia e faoala mai i lau auuuna o le ua faatuatua ia te oe. Le Alii, ia e alofa mai ia te au: aua ou te valaau atu ia te oe i aso uma lava. . . . Le Alii e lo'u Atua, ou te vivii atu ia te oe i lo'u loto atoa; ou te faaneene atu lava i lou suafa e faavavau" (Salamo 86:2-3, 12).
8. Mataupu Faavae ma Feagaiga 98:2-3.
9. O loo ta'ua le sefuluui i tusi e valu o le Feagaiga Tuai: Kenese, Levitiko, Numera, Teuteronome, 2 Nofoaiga a Tupu, Neemia, Amosa ma le Malaki.
10. Malaki 3:10.
11. Mataupu Faavae ma Feagaiga 85:3.
12. 2 Timoteo 3:12.
13. Tagai Mataupu Faavae ma Feagaiga 86:8-11.
14. Tagai Mataupu Faavae ma Feagaiga 107:18.
15. Tagai Mataupu Faavae ma Feagaiga 132:47, 59.
16. Tagai Aperaamo 2:11.
17. Isaia 49:25; tagai foi Mataupu Faavae ma Feagaiga 105:14.
18. Mataupu Faavae ma Feagaiga 98:37.
19. Thomas S. Monson, "Be of Good Cheer," *Liahona*, Me 2009, 92.